

. TOBIAE .

[...] contristatus contra *deum* quod plaga cecitatis euenerit ei;

¹⁴Sed immobilis in dei timore permansit agens gratias deo omnibus diebus uitae suae; ¹⁵Nam sicut beato iob insultabant reges ita isti parentes *et* cognati eius inridebant uitam eius dicentes: ¹⁶Ubi est spes tua pro qua elymosinas *et* sepulturas faciebas?

¹⁷Tobias uero increpabat eos dicens: Nolite ita loqui ¹⁸*quoniam* filii *sanctorum* sumus *et* uitam illam expectamus quam *deus* daturus est his qui fidem suam numquam mutant ab eo. ¹⁹Anna uero uxor eius ibat ad textrinum opus cotidie; *et* de labore manuum suarum uictum quem consequi potuisset deferebat. ²⁰Unde factum est ut hedum caprarum accipiens detulisset domi;

²¹cuius cum uocem balantis uir eius audisset dixit: Uidete ne forte furtiuus sit reddite eum dominis suis, quia non licet nobis ex furto aliquid aut edere aut contingere. ²²Ad haec autem uxor eius irata respondit: Manifeste uana facta est spes tua; *et* elemosinae tuae modo paru(er)unt; ²³Atque his *et* aliis huiusmodi uerbis exprobrabat ei

3 ¹Tunc tobias ingemuit *et* caepit orare cum lacrimis ²dicens: lustus es *domine* *et* omnia iudicia tua uera sunt *et* omnes uiae tuae misericordia *et* ueritas *et* iudicium;

³*Et* nunc *domine* memor esto mei; *et* ne uindictam sumas de peccatis meis; Neque reminiscaris delicta mea uel parentum meorum ⁴*quoniam* non oboediuimus praeceptis tuis *et* traditi sumus in direptionem *et* captiuitatem *et* mortem

et in fabulam *et* in inproperium omnibus nationibus in quibus dispersisti nos; ⁵*Et* nunc *domine* magna iudicia tua quia non egimus secundum praecepta tua *et* non ambulauimus sinceriter coram te; ⁶*Et* nunc *domine* secundum uoluntatem tuam fac mecum; *et* precipe in pace recipi *spiritum* meum; Expedi enim mihi mori magis quam uiuere;

⁷Eadem itaque die contigit ut sarra filia raguel in ciuitate medorum ut *et* ipsa audiret inproperium ab una ex ancillis patris sui;

⁸Quoniam tradita fuerat septem uiris *et* *demonium* nomine asmodeus occiderat eos mox ut ingressi fuissent ad eam; ⁹Ergo cum pro culpa sua increparet puellam respondit ei dicens; Amplius ex te non uideamus filium aut filiam super terram interfetrrix uirorum tuorum; ¹⁰Numquid *et* me occidere uis sicut *et* iam septem uiros occidisti; Ad hanc uocem perrexit in superiori cubiculo domus suae *et* tribus diebus *et* tribus noctibus non manducauit neque bibit ¹¹sed in oratione persistens lacrimis depraecabatur *dominum* ut ab isto inproperio liberaret eam; ¹²Factum est autem tertia die dum conpleret orationem benedicens *dominum* ¹³dixit: Benedictum est nomen tuum *deus* patrum nostrorum qui cum iratus fueris misericordiam facies *et* in tempore tribulationis peccata dimitas his qui inuocant te; ¹⁴Ad te *domine* faciem meam conuerto ad te oculos meos conuerto; ¹⁵Peto te *domine* ut de uinculo inproperii huius absoluas me aut certe de super terram eri-

LIBER

pias me. ¹⁶Tu scis *domine* quia numquam concupiui uirum *et* mundam seruauim animam meam ab omni concupiscentia; ¹⁷Numquam cum ludentibus miscui me neque cum his qui in leuitate ambulant participem me praebui; ¹⁸Uirum autem cum timore tuo non cum libidine mea consensi suscipere ¹⁹*et* aut ego indigna fui illis aut mihi illi forsitan digni non fuerunt. Quia forsitan uiro alii conseruasti me ²⁰Non est enim in hominis potestate consilium tuum; ²¹Hoc enim pro certo habet omnis qui colit te quia uita eius si in probatione fuerit coronabitur Si autem in tribulatione fuerit liberabitur *et* si in correptione fuerit ad misericordiam tuam peruenire licebit. ²²Non enim delectaris in perditionibus nostris quia post tempestatem tranquillum facis *et* post lacrimationem *et* fletum exultationem infundis. ²³Sit nomen tuum *deus* israhel benedictum in secula; ²⁴In illo tempore exauditae sunt praeces amborum in conspectu gloriae summi dei; ²⁵*Et* missus est angelus *domini sanctus* rafahel Ut curaret ambos quorum uno tempore sunt orationes in conspectu *domini* recitatae.

4 ¹Igitur cum tobias putaret orationem suam exaudiri ut mori potuisset Uocauit ad se tobiam filium suum ²dixitque ei; Audi fili mi uerba oris mei *et* ea in corde tuo quasi fundamenta construe; ³Cum acceperit *deus* animam meam corpus meum sepaeli *et* honorem habebis matri tuae omnibus diebus uitae eius;

⁴Memor enim esse debes quae *et* quanta pericula passa sit propter te in utero suo; ⁵Cum autem *et* ipsa compleuerit tempus uitae suae sepelies eam circa me; ⁶Omnibus autem diebus uitae tuae in mente habeto *dominum et* caue ne aliquando peccato consentias *et* praetermittas praecepta dei nostri ⁷Ex substantia tua fac elemosinam *et* noli auertere faciem tuam ab ullo paupere; Ita enim fiet ut nec a te auertatur facies *domini* ⁸Quomodo potueris ita esto misericors ⁹Si multum tibi fuerit habundanter tribue; Si exiguum fuerit *etiam* exiguum libenter inpertre stude; ¹⁰Praemium enim bonum tibi thesaurizas in die necessitatis; ¹¹Quoniam elemosina ab omni peccato *et* a morte liberat; *et* non patietur animam ire in tenebris; ¹²Fiducia magna erit coram summo deo elemosina omnibus facientibus eam; ¹³Attende tibi fili ab omni fornicatione *et* praeter uxorem tuam numquam patiaris crimen scire; ¹⁴Superbiam numquam in tuo sensu aut in tuo uerbo dominari permittas. In ipsa enim initium sumpsit omnis perditio ¹⁵Quicumque aliquid tibi operatus fuerit statim mercedem ei restitue; *et* merces mercenarii tui apud te omnino non maneat; ¹⁶Quod ab alio odis fieri tibi uide ne alteri tu aliquando facias; ¹⁷Panem tuum cum esurientibus *et* egenis comede; *et* de uestimentis tuis nudos tege; ¹⁸Panem tuum *et* uinum tuum super sepulturam iusti constitue *et* noli ex eo manducare *et* bibere cum peccatoribus; ¹⁹Consilium [...]